



## Universitätsbibliothek Paderborn

### **Instructio practica ...**

De Horis Canonicis Juxta Rubricas Breviarii Romani ritè recitandis - In qua etiam ipsæ Rubricæ Notis brevibus illustratæ, & Martyrologij Romani nomina suis Accentibus signata continentur, Ad Faciliorem Discentium Vsvm Ac Praxin

**Lohner, Tobias**

**Dilingæ, 1676**

Tit. XXVII. De Responsorijs.

[urn:nbn:de:hbz:466:1-48333](https://nbn-resolving.org/urn:nbn:de:hbz:466:1-48333)

principio Completorii, & in fine Primæ post *Pretiosa*; præterquam in triduo majoris hebdomadæ ante Pascha, & in Officio Defunctorum, ut suis locis ponitur.

E. Quia hæc verba non ad Hominem, sed DEVM diriguntur, iisque gratia petitur, ut debitum ex talibus Lectionibus fructum referre possimus; unde merito *Domine*, non *Domne* dicitur.

## TITULUS XXVII.

### DE RESPONSORIIS.

I. **R**esponsorialia f. dicuntur ad Matutinum post Lectiones, id est, post quamlibet Lectionem dicitur unum Responsorium, ut infra.

F. Sic dicta, quia uno Lectiones dicente, & Versum, Chorus respondet. Ideoque ab Ecclesia, teste Gavanto f. 5. c. 13. n. 4. instituta sunt, ut ex iisdem colligamus, Ecclesiam optare, ut non Auditores tantum Verbi divini in Lectionibus propositis finis, sed Factores etiam. Juxta Hugonem verò ib. cit. sunt Canticum Spirituale ad animos inter legendum sublevandos ordinatum.

II. In Festis novem Lectionum (præterquam in Festo SS. Innocentium, quando non venerit in Dominica) & in Dominicis ab Octava Paschæ inclusive usque ad Adventum exclusive, & à Dominica infra Octavam Nativitatis inclusive usque ad Septuagesimam exclusive dicuntur octo tantum Responsorialia, & in fine Tertij, & Sexti, & Octavi dicitur *Gloria Patri* cum repetitione partis Responsorij: quod regulare est in fine ultimi Responsorij cujuslibet Nocturni tam in Officio novem, quam trium Lectionum, excepto tempore Passionis, quo tempore loco *Gloria Patri* repetitur Responsorium à principio: excepto etiam Officio Defunctorum, cujus

loco dicitur *Requiem eternam*. Qui Versus *Gloria Patri* quibusdam diebus dicitur in primo Responsorio, ut in proprijs locis notatur. g. Post nonam Lectionem prædictis diebus, quando octo tantum dicuntur Responsoriora, immediatè dicitur Hymnus *Te DEVM*.

G. Ut in Dominicæ primæ Adventus primo Nocturno videre est.

III. In Dominicis Adventûs, & in Dominicis à Septuagesima usque ad Dominicam Palmarum inclusivè, & in triduo ante Pascha dicuntur novem Responsoriora, quia tunc non dicitur *Te DEVM*.

IV. In Officio autem trium Lectionum, quando fit de Festo, & in Ferijs temporis Paschalis, quod est inter Dominicam in Albis & Ascensionem (exceptâ Feriâ secundâ Rogationum, in qua ponitur tertium Responsorium) dicuntur duo Responsoriora, quia post tertium dicitur *Te DEVM*. Quæ Responsoriora in Festis sumuntur de Communi Sanctorum, & in prædictis Ferijs temporis Paschalis, quando alia propria non assignantur, sumuntur de Dominica, in qua primò sunt posita hoc ordine: Secundâ & quintâ Feriâ primum & secundum Responsorium primi Nocturni: Feriâ tertiâ & sextâ primum & secundum Responsorium secundi Nocturni: Feriâ quartâ primum & secundum Responsorium tertij Nocturni, b.

H. Ita tamen, ut semper in secundo Responsorio velut ultimo illius Officij Versus *Gloria Patri* post secundam repetitionem partis Responsorij addatur.

V. In alijs Ferijs extra tempus Paschale dicuntur tria Responsoriora (quia in illis non dicitur *Te DEVM*) hoc ordine: Feriâ secundâ & quintâ tria Responsoriora primi Nocturni: Feriâ tertiâ & sextâ tria

tria Responsorialia secundi Nocturni: Feriâ quartâ & Sabbato, quando in eo fit de Feria, tria Responsorialia tertij Nocturni Dominicæ præcedentis, in quæ primò sunt posita. Verùm quia in tertio Nocturno Dominicarum à tertia post Pentecosten inclusivè i. usque ad Adventum exclusivè, non habetur nisi unum Responsorium dicendum infra hebdomadam, quod est septimum in Dominica: propterea quòd Responsorium *Duo Seraphin* non dicitur, nisi in prædictis Dominicis, ideo Feriâ quartâ, & in Sabbato, quando Responsorialia sumenda erunt ex tertio Nocturno, primum Responsorium erit, quod est septimum Dominicæ; secundo & tertio loco dicitur secundum & tertium sequentis Feriæ, id est, post secundam & tertiam Lectionem dicitur secundum & tertium Responsorium, quod est secundum & tertium secundæ sequentis Feriæ, si propria Responsorialia habuerit; alioquin si non habuerit propria, dicitur secundum & tertium Responsorium primi Nocturni ejusdem Dominicæ. Ab Octava Epiphaniæ usque ad Septuagesimam habentur Responsorialia propria in singulis Ferijs, excepto Sabbato, in quo, quando fit de Feria, dicuntur Responsorialia Feriæ quartæ. k.

I. Nam ab hac propriè incipit iterum Officium Dominicarum, quia prima post Pentecosten est Dominica Trinitatis; secunda verò est Dominica infra Octavam Corporis Christi, quæ habent propria Officia constantia novem duntaxat Psalmis, ut Festa novem Lectionum.

X. Quod solùm accidere potest, si Dominica, quæ poni non potest, in Sabbato sit anticipanda.

VI. Sumuntur autem Responsorialia ex eo loco, ubi primò sunt posita in principio mensis vel libri,

& repetuntur in alijs sequentibus Dominicis illius mensis, in quibus alia non assignantur; vel donec in illo libro legatur, unde sumpta sunt Responsoria. Quæ autem in prima hebdomada mensis sunt posita per Ferias, repetuntur eodem ordine in eisdem Ferijs per sequentes hebdomadas, donec alia ponantur. Ubi verò non adsunt propria, semper ex Nocturnis Dominicæ sumuntur dicto ordine.

VII. Si Responsoria primi Nocturni ejus Dominicæ, in qua primò ponuntur, propter Festum Duplex in ea occurrens, in ipsa Dominica poni non possint, ponantur primâ die ejus hebdomadæ, in qua occurrit fieri de Feria, & omittantur alia, quæ fortè in illa Feria propria habentur. Si verò in tota hebdomada non occurrat dies, in quo fiat de Feria, illa Responsoria ponantur in sequenti hebdomada vel Dominica similiter non impedita, dummodo in ea alia Responsoria non sint primò ponenda; alioquin eo anno omittantur. Responsoria etiam, quæ in aliquibus Ferijs per hebdomadam habentur, si eo die, quo posita sunt, non possunt dici propter Festum occurrens, non sunt transferenda in alium diem, sed omittuntur.

VII. Tempore Paschali in fine Responsorij ante Versum *l.* additur *Alleluja.*

*l.* Quem Gavantus *l. c. n. 5.* putat in Choro semper ab eo dicendum, qui inchoat Responsorium; quamvis aliqui in privata recitatione contrarium practicent. Monet quoque idem Author *n. 9.* Responsoria de S. Tobia, si in Dominica, aut secunda & tertia Feria poni non possint, Feriâ quartâ ponenda esse; sed postea Feriâ quintâ, ne eadem immediate repetantur, Responsoria secundi Nocturni Dominicæ sumenda esse eâ ratione, quæ in Festo SS. Philippi & Jacobi in Sabbato ante Dominicam quartam post Pascha occurrentibus observatur.

TITV.